

## Edizioni

- letto 474 volte

## Aston

Del sieu tort farai esmenda  
lieys que·m fetz partir de se,  
qu'enquer ai talan que·l renda,  
si·l platz, mas chansos e me  
ses respieg d'autra merce;  
sol suefra qu'en lieys m'entenda  
e que·l belh nien n'atenda.

Ges per negun mal qu'en prenda  
de s'amistat no·m recre,  
ans suefri c'ades m'acenda  
la pen' e·l danz que m'en ve.  
Faire·m degra qualche be,  
mas no·s tanh qu'ieu la·n reprenda  
si tot s'es vers qu'ilh mesprenda.

Molt en cossir nueg e dia  
e no m'en sai cosselhar.  
pero, si s'esdevenia,  
gran talan ai qu'un baisar  
li pogues tolr' o emblar;  
e si pueys s'en iraissia  
voluntiers lo li rendria.

Ben conosc qu'ieu no poiria  
mon cor de s'amor ostar  
per ira ni per feunia  
ni per outra domn' amar.  
No m'en cal plus assaiar;  
aissi cum li plaira, sia,  
qu'ieu l'amarai tota via.

El mon non es hom que tenha  
tan apoderat amors,  
que ges non vol qu'ieu retenha  
los plasers ni las honors

qu'avia trobat aillors;  
ans vol que sai mi destrenha  
per tal que no·m vol ni·m denha.

Belha domna, en cui renha  
senz e beutatz e valors,  
suffriretz qu'aissi m'estenha  
lo desirs e la dolors?  
Sivals dels plazers menors  
mi faitz tant que joys m'en venha,  
sol qu'a vos non descovenha.

Chansoneta, vai de cors  
dir a midons que·t retenha,  
pus mi retener non denha.

Dalfi, solatz et amors  
e cortes sens vos essenha  
cossi joys e pretz vos venha.

- letto 332 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropea.let.uniroma1.it/?q=laboratorio/edizioni-44>